

戲假情真

孫巧珍

角色：

真真：傻乎乎的女孩，經常做出一些令人發笑的糊塗事

老板：因不願看見人們的虛偽而終日戴著墨鏡

楚楚：喜歡裝可憐

Baby：喜歡裝可愛

勝哥：喜歡裝好人

亞 Ken：喜歡裝酷

其他：

公司 —— 真真父母

餐廳 —— 侍應甲、乙

家中 —— 母、弟、小燕

醫院 —— 醫生、護士

序幕：室內設計公司

（老板和真真坐在會議室內）

老板：（戴著墨鏡）黎真真小姐，點解你會有興趣應徵呢份工呢？

真真：（傻笑）呵呵，因為我覺得設計好好玩囉，我以前最鍾意幫我啲 **Barbie** 公仔整靚間屋架啦！而且可以將一間屋整到好靚咁俾人住，真係好開心架！我都成日幫自己間屋設計架，我上個禮拜喺客廳同每間房嘅天花板畫咗好多種天氣呀，有太陽啦、白雲啦、閃電啦、落雨啦，以後想要咩天氣就有咩天氣，係咪好正呢！我爹哋媽咪見到都開心到傻咗呀！仲讚我有創意添！（洋洋得意，興奮地轉著椅子）

（真真父母並站在舞台的另一邊，燈光集中在他們身上）

真真父母：（苦笑，無奈地）係呀…好有創意呀…

真真：（愈轉愈快，邊轉邊笑）哈哈…我地鬥快轉呀！尼啦！唔使驚喎！好刺激架！我以前成日同我細佬玩架！欸，爬龍舟都好好玩架！坐喺梳發上面，擺隻拖鞋喺側邊爬呀爬…爬呀爬…（雙手拿著高跟鞋在椅子上作爬龍舟狀）一、二、一、二…好似爬龍舟咁。（氣喘吁吁）ok

老板：（怔住）嗯…黎小姐…

真真：叫我真真得啦！

老板：真真…個名好好聽。（起來跟真真握手）

真真：（穿起鞋子，起來跟老板握手，傻笑）嘻嘻，多謝。

老板：希望你個人同個名一樣。

真真：下？

老板：哦，無，以後俾心機做野啦，我介紹 d 同事俾你識呀。

真真：（傻笑）呵呵，好呀。

（二人走向會議室門口）

真真：老板呀…

老板：（回過頭來）嗯？

真真：（猶豫）嗯…你介唔介意我問你一個問題呀？

老板：你問啦。

真真：你睇唔到嘢係咪好辛苦呀？你係咪一出世就睇唔到嘢架啦？好可憐呀！不過我真係好佩服你呀，雖然對眼睇唔到嘢，但係你仲係咁積極咁面對人生，將間公司搞到有聲有色，我以後一定會以你為榜樣，俾心機做野架！

老板：（愕然）邊個話我係盲架？

真真：吓…我以為…對唔住呀…我以為…

老板：我戴黑超只係因為唔想見到某啲嘢啫…

真真：吓？

（老板走出會議室，拍拍手掌，眾職員站起來，望向老板和真真）

老板：各位，呢位係你地嘅新同事黎真真小姐，（向真真）呢個係亞 Ken、Baby、勝哥、楚楚，以後你有咩唔明嘅，可以問佢地或者直接嚟問我。

真真：（傻笑）呵呵，我會架啦，大家叫我真真得架啦，以後請多多指教！

（亞 Ken 坐下）

勝哥：有咩事即管同我講啦，唔使怕醜架！

真真：嗯！

Baby：唔制！同佢講之前要同我講先！

真真：（傻笑）呵呵，好呀！點解要搵住隻 Hello Kitty 喺條頸度嘅？好得意呀！

Baby：係咪好可愛呢！我最鍾意 Hello Kitty 架啦！（吻了 Hello Kitty 一下）

（楚楚走上前拉著真真的手）

楚楚：（眼泛淚光）太好啦，以後又多一個人同我傾心事啦！

真真：（傻笑）呵呵…

（老板不耐地托托墨鏡，走向辦公室）

（燈滅）

第二幕：餐廳

（老板和眾職員入）

勝哥：為咗歡近我地嘅新同事真真，老板話呢餐佢請，大家想食咩就嗌咩啦！

Baby：好嘢！老板萬歲！（給老板一個飛吻）

真真：（傻笑）呵呵，多謝老板！

楚楚：（眼泛淚光）好彩有你咋老板，如果唔係我今日就要挨餓啦…

勝哥：你唔記得帶銀包呀？

楚楚：我個銀包宜家連一蚊都有，帶唔帶都一樣…你地知我老豆幾爛賭架啦，尋日佢又問我擺錢…

老板：（打斷楚楚的話）叫嘢食先啦！（招手）**Waiter**！我要一個芝士牛柳粒焗飯同青檸冰。

亞 **Ken**：我要香草焗豬扒飯。

Baby：我要一個鮮蟹肉龍蝦汁炒天使麵…同埋燒車厘茄忌廉湯呀！唔該晒！（對待應眨眨眼，擠起甜甜的笑容）

楚楚：我要一個泰式煙鴨胸魷魚沙律同一杯薄荷特飲…

勝哥：你要咩呀真真？

真真：（苦惱地翻著餐牌）我想食吉列豬扒呀！呀！有啦，我要吉列豬扒粟米雞寶飯！

侍應甲：要燒汁定黑椒汁架？？

真真：燒汁…

勝哥：我要一個鮮露荀雜菌焗龍利飯…飲三色冰呀…

侍應甲：（向真真）請問嗰位小姐飲咩呀？

（真真正與 Baby 和楚楚說笑）

勝哥：真真…真真…（拍拍真真）

真真：（傻笑）吓？

侍應甲：係…請問飲咩架？

真真：吓？燒汁呀！

侍應甲：（愣住）燒汁？飲…燒汁？

真真：（恍然大悟）哦…奶茶呀！

（眾人笑，亞 Ken 別過臉，掩著嘴偷笑）

侍應甲：（笑）好嘅…請稍等…

真真：（傻笑）呵呵…我成日都係咁…（尷尬地搔搔頭）

（眾人閑聊，侍應乙上菜）

侍應乙：請慢用。

（真真一邊聊天，一邊拆開筷子套，把一隻筷子當作飲管插入杯中吸吮）

真真：（皺眉）咦？吮唔到嘅？（一看原來是筷子，趕忙拿起，換上飲管，然後尷尬地看看眾人，又傻笑）呵呵…（搔搔頭）

Baby：（向真真眨眨眼）你無事呀嗎？

真真：（傻笑）呵呵…無事無事…

（亞 Ken 別過臉，笑得肩膊抽搐）

（眾人開始吃飯，過了一會）

真真：（看著眾人手上的叉，再看看自己右手拿著匙羹，開始苦惱地在桌上搜尋）咦？我支叉呢？

勝哥：吓？你咪揸住咗囉…

真真：吓？（看看左手拿著叉）咦！係喎…無睇到呢隻手添…（傻笑）呵呵…（搔搔頭）

（眾人呆若木雞）

亞 Ken：（忍著笑）Excuse me…（掩著滿腹笑意走向洗手間）

楚楚：唔好意思，我都想去洗手間。

Baby：欸，等埋我，我又去！

（二人走向洗手間）

楚楚：你覺得嗰個真真點呀？

Baby：開頭睇落個樣都幾單純嘅…但係投先你都見架啦，咪又係喺度咋癲扮傻…依家呢個社會，有邊個唔係戴住面具架，之前電視咪做咩《真人 Show》嘅，我就唔信啲人喺鏡頭前會唔扮野！

真真：（拿起老板的青檸冰喝了一口，隨即面容扭曲）咁酸嘅？

老板：（無奈）杯嘢係我架…

真真：呃…對唔住呀！（把自己的奶茶推給老板）你飲返我個杯呀！

老板：（無奈地笑，揮手搖頭）唔使嘞…

楚楚：不過佢啲演技都幾好架喎！我見到佢個傻樣都忍唔住想笑！

Baby：既然佢咁叻扮傻，我地一於嚟招將計就計！

楚楚：即係點呀？

（真真鋸扒的時候，不小心把豬扒翻落桌子）

真真：（傻笑）呵呵…（用叉子把桌上的豬扒叉回碟子）

（老板傻了眼）

Baby：無腦架你？！即係搵佢笨囉！

楚楚：哦…

Baby：好心你個腦唔好成日淨係諗住買名牌啦…

楚楚：（興奮地）係呀！我前日喺香奈兒買左件襖，用咗我成兩個月糧架，聽日著番嚟俾你睇呀…

（燈滅）

第三幕：公司

真真：嘩！你件襖好靚呀！名牌尼喎！

楚楚：（掩飾）咩名牌呀…水貨嚟咋…

真真：（驚嘆）嘩！犀利呀！做到同雜誌印嘅一模一樣呀！

楚楚：質地差好遠…唉！你都唔知我老豆幾爛賭，我辛辛苦苦賺番尼嘅錢都俾佢輸乾輸淨啦！仲邊有錢…（吸吸鼻子，擦擦眼睛）

真真：（見楚楚哭，不知所措）你唔好咁啦…

楚楚：（痛苦地拍拍額頭）可唔可以幫我斟杯水呀？

真真：哦…（倒了杯水給楚楚）

楚楚：唉！唔該…（喝水）唉！（痛苦地搓揉著額頭）一諗起呢啲嘢個頭就痛嘞…唉！仲有成堆嘢未做添架…

真真：你抖下先啦！

楚楚：唉！啲嘢唔做唔得架…

真真：（擔憂地）你休息吓啦！要做啲咩我幫你呀！

楚楚：唔好意思嘅…

真真：客咩氣喎！

楚楚：（捧起一大疊文件）呢啲都係趕住要架…

真真：（傻笑著接過文件）呵呵…無問題…（回到自己的位置工作。一會兒，Baby 入）

Baby：（在真真耳邊喊）真真！

真真：（嚇了一跳）嚇死我…

Baby：（眨眨眼）嘻嘻，玩下之嘛…（雙手搖著真真的肩膀）

真真：做咩呀？

Baby：（伏在真真的背上撒嬌）係咁嘅…今日係我細佬生日呀…我應承話早啲返

去同佢慶祝架…但係啲嘢又未做完…你可唔可以幫吓我呀？

真真：但係我仲有一大疊嘢未做喎…（看看楚楚交給她的一堆文件，轉向旁邊的亞 Ken）亞 Ken…

亞 Ken：我從來都唔理人地嘅事。

真真：（嘟嘟嘴，轉向勝哥）勝哥…

勝哥：（皺起眉頭）對唔住呀，我都好想幫你地架，但係陣間我要帶屋企隻貓去覆診…所以…

真真：（失望）哦…唔緊要啦…（向 Baby）Baby 你有啲咩要做嘅就擺俾我嘞…

Baby：真嘅？（親親真真的臉頰）多謝你呀！我就知道你係最好人架嘞！

真真：唔使客氣…就當係我送俾你細佬既生日禮物啦！（傻笑）呵呵…

Baby：（隨即把一疊文件放在真真的桌上）係咁就拜託你啦！

（真真看著桌上又增高了的文件傻笑）

Baby：真真呀…正所謂「好人做到底，送佛送到西」…你可唔可以幫多我一樣嘢咁多多呀？

真真：咩事呀？

Baby：係咁嘅…就尼咪有周杰倫演唱會嘅…我媽咪話好想去睇喎…不過你知啲飛幾難撲架啦…聽朝如果買唔到嘅話就有架啦…但係聽朝我又要去接我五姑媽出院喎…所以…你可唔可以幫我…

真真：無問題！邊間醫院呀？

Baby：呃…接姑媽出院呢啲嘢都係親自去好啲嘅…我係想你幫我去買演唱會飛呀。

真真：吓…好難撲架喎…陣間買唔到點算呀？你媽咪咪會好唔開心囉…

Baby：放心！我對你好有信心！我相信你一定撲到返尼架！

真真：（為難）但係…

Baby：（撒嬌）好啦…吓？好啦…你都唔想我媽咪失望架…

真真：好啦好啦…

Baby：YES！真真萬歲！（親親真真的雙頰，然後手舞足蹈地回到自己的座位）

真真：（無奈地傻笑）呵呵…唉…（繼續埋頭苦幹）

（Baby、楚楚、亞 Ken、勝哥陸續離開）

真真：（伸伸懶腰，打了個大呵欠，抬頭看看牆上的鐘）嘩！九點架嘞…（環視四周）啲人幾時走晒架？（看看桌上的一疊文件）唉…帶番屋企做啦唯有。

（真真收拾好東西，走向門口）

真真：（在門口滑倒）哎呀！做乜個地下咁濕嘅？

老板：（扶真真起來，撿起地上的文件）無事呀嗎？出面落好大雨呀，我車你返去呀。

真真：唔使啦，我有帶摺呀！（打開手提包找雨傘，卻找出一個黑色的電視遙控器，二人愣住）點會咁架？（大惑不解）我明明出門口嗰陣放咗把黑色嘅摺骨摺入去架…點會變咗做遙控架？

老板：（捧腹大笑）哈哈…算吧啦…都係等我送你啦…

真真：（傻笑）呵呵…

（二人上車）

（電話鈴聲）

真真：喂，小燕呀，宜家返緊屋企囉，睇咩戲呀？哦…呢套戲好慘架喎我聽人講…唔會架啦…我上次會成兜爆谷飛落前面個頭度…都係因為一時之間適應唔

到啲咁燦眼嘅光咋嘛…咩喎…嗰陣原本黑蚊蚊架嘛…無端端彈咁鬼大個嚴禁吸煙嘅白色標誌…嚇親都好正常啫…

老板：哈哈…

真真：好啦，唔同你講啦，遲啲再同你約時間啦！OK，拜拜！（掛線，尷尬地看看老板，傻笑）呵呵…

老板：（從倒後鏡中看見後座的一袋文件）班人則嘢俾你做呀？

真真：哦…冇…佢地今日唔得閑呀嘛…

老板：唔通你睇唔出佢地係扮野，搵你笨架咩？

真真：吓？唔知呀…

老板：唔好咁傻啦！班人有第一次，就會有第二次、第三次架喇…佢地係咩人我知道架，一個扮 cool，一個懶好人，一個扮可憐！自己攞晒啲錢去買名牌仲屈老豆爛賭…我最睇唔過眼就係嗰個 Baby，扮晒可愛就得架喇咩，連演唱會飛都要人地幫佢買，你方佢真係咁孝順為咗佢阿媽咩，佢阿媽可能連周杰倫係邊個都唔知呀！擺明想喺男朋友面前邀功，話係自己點千辛萬苦咁撲飛俾佢啦！

真真：咁我又冇諗咁多呀…幫得咪盡量幫囉…咪有句說話叫「寧可信其有，不可信其冇」嘅，我覺得對人地講嘅嘢，都應該抱呢種態度，如果下下都要防住人，諗吓人地邊句真邊句假，實頭痛死呀。

老板：但係你根本就冇義務幫佢地做嘢，你唔覺得自己咁樣好傻架咩？

真真：嗯…或者人地會覺得我好傻…不過唔理點都好，我都會繼續做我自己覺得啱嘅事。雖然我有時會做好多蠢事，但係我都係鍾意做番真正嘅自己…因為要我扮聰明嘅話太辛苦啦…（傻笑）呵呵…

老板：（笑）你真係好鍾意笑喎…

真真：活到老，笑到老呀嘛！（傻笑）呵呵…其實就算佢地真係好似你講嘅咁樣，我都係會幫佢地，因為我幫完佢地之後佢地都會好開心，能夠令到其他人開心，我就會覺得好開心、好自豪架啦！呵呵…

(老板脫下墨鏡，深深地看著真真)

(燈滅)

第四幕：家中

(真真在書桌前看麥兜，笑個不停)

媽：亞真呀！

真真：哈哈…咩事呀？哈哈…笑死我啦…哈哈…(笑出眼淚)

媽：你幾時先捨得去剪頭髮呀？周圍都係你啲頭髮啦！

真真：哈哈…過多排先啦…好好笑…你睇吓…哈哈…

媽：咁得閑睇呢啲嘢嘅今日？你响公司拎番尼個一袋二袋做好晒啦？

真真：邊有咁快呀…唉！呢排晚晚都開通宵，做到我頭都暈埋，咪睇吓麥兜，鬆弛一下神經囉。

媽：啱嘅，吊頸都要抖下氣呀嘛。

真真：(傻笑) 嗯！

媽：好啦，我出去買啲冬瓜番尼煲湯你飲，最近你成日都流鼻血，飲啲冬瓜湯可以降吓火呀。

真真：哦，拜拜！

媽：拜拜！睇住細佬呀！

真真：哦！

(媽出，真真繼續看麥兜，又笑個不停)

弟：家姐！你使唔使笑成咁呀？

真真：哈哈…好好笑…咩事呀？

弟：（沒好氣）你做咩又將對鞋擺入雪櫃呀？整臭晒我件布甸啦！

真真：（呆了）吓？（出去打開雪櫃）哎呀！擺錯位添…（拿出鞋子，不好意思地看著弟弟笑）呵呵…

弟：（嘀咕）唉！天哪！邊有啲咁嘅家姐架！（向真真）喂！我去打波呀！

真真：哦，唔好咁夜返呀。

（弟出）

真真：（看看牆上的鐘）哎呀！《藍色生死戀》開始啦！（趕忙扭開電視機）哎呀！開始緊啦！（全神貫注地盯著電視。一面看，一面擦眼淚）

（電話鈴聲）

（真真到處翻電話，最後發現原來在自己的褲袋裏）

真真：（拖著哭腔）喂…

小燕：真真呀…小燕呀…

真真：（放聲大哭）小燕…

小燕：發生咩事呀？

真真：（哭）恩熙佢有血癌呀…佢…佢就尼死啦…

小燕：邊個係恩熙呀？

真真：（飲泣）你有睇《藍色生死戀》咩？恩熙咪係個女主角囉…佢…佢就尼死啦…

小燕：（沒好氣）佢就尼死咋嘛又唔係你就尼死，我以為你咩事喊得咁慘…唉！

真係冇你咁好氣！

真真：（飲泣）咁真係好慘呀嘛…

小燕：唉！俾你搞到我想講乜都唔記得添…我醒起再打俾你啦！拜拜！

真真：（飲泣）拜拜…（掛線）

（真真流鼻血，趕忙拿紙巾）

真真：（奇怪）做乜尼排成日流鼻血架？今朝已經流咗一次架啦又流…再咁流法實貧血得嘞…

（真真欲把紙巾扔進垃圾桶時，發現里面有一大團頭髮）

真真：（看看染血的紙巾，再看看那團頭髮，不禁打了個哆嗦，愣住）同恩熙一模一樣呀…唔怪得我最近成日都覺得咁劫…仲成日頭暈眼花…原來…原來我有血癌…已經末期啦…（顫抖）無得救啦…恩熙就厄死啦…咁即係…咁即係我都…（手上的紙巾掉落地上，跌坐在地上）點算呀…（飲泣）我唔想死呀…死咗就見唔到爸爸媽媽…冇得再同細佬玩…自己一個人孤伶伶…到時點算…點算…得番我自己一個…點算…我唔想死呀…（泣不成聲）

（燈滅）

第五幕：公司

（真真呆坐在辦公桌前）

楚楚：（疑惑地看著真真，問 Baby）喂，佢今日做咩呀？

Baby：點知啫，話唔定人地改戲路呢，扮完傻宜家扮呆囉…

楚楚：唔似啫…我覺得佢有啲唔妥…

真真：（從地上撿起幾條頭髮，喃喃自語）又用啦…

楚楚：你睇佢…佢成朝就係不停咁重覆呢個動作…

（亞 Ken 偷瞄了真真一眼）

Baby：估乜鬼呀，問吓佢咪知囉。

（二人走向真真）

勝哥：真真…真真…（拍拍真真）

（真真轉過臉來）

勝哥：你冇事呀嘛？（真真搖搖頭）有咩事唔怕同我講嘞，我一定會盡力幫你架！

Baby：（眨眨眼，擠起甜甜的笑容）係呀係呀，有咩事一定要講出尼呀，屈係個心度好辛苦架！

楚楚：（看著桌上的頭髮）做乜咁多頭髮嘅？

（老板入）

老板：做咩圍晒喺度呀？

真真：（看看桌上的頭髮，放聲大哭，眾人吃了一驚）我有血癌呀…

眾人：（怔住）吓…點會咁架？

真真：（泣不成聲）已經末期啦…

楚楚：咁…咁你仲返咩工呀？快啲返屋企休息啦！去做啲你想做嘅嘢呀嘛！

真真：（哭）我真係好唔捨得爸爸媽媽…細佬…我啲朋友…仲有老板…同埋你地…我地啱啱識咗冇幾耐…估唔到咁快就要…

（眾人既傷心又慚愧）

楚楚：（感動落淚）我地咁對你…你竟然話唔捨得我地…

勝哥：（眼淚盈眶）真真…有啲咩要我幫手嘅…你即管開聲啦…我一定唔會再托你手踭架！

Baby：（抽泣）對唔住呀…我以為你咋傻…成日都搵你笨…對唔住呀…（捧起桌上的文件）你…你抖吓啦！以後呢啲嘢等我做得嘞！

楚楚：（取過 Baby 手上的一半文件）我幫你手…

亞 Ken：攞啲尼呀…（分別從 Baby 和楚楚的手上取過一些文件）

真真：（感動落淚）多謝你地呀…（起來）我去買 lunch 呀…係咪照舊呀？

勝哥：呢啲粗重嘢等我尼啦！（出）

Baby：你坐啦！等佢去得嘞！

（老板脫下墨鏡，動容地看著眾人）

老板：（向真真）真真…不如你試吓做化療呀，可能有機會醫番好呢…錢銀嘅嘢我可以幫你架！

楚楚：你千祈唔好放棄呀真真！我都識得幾個做中醫嘅朋友架，我今晚就去叫佢地執幾劑藥俾你，話唔定食完就好番呢…

亞 Ken：（脫下項鍊）呢條係我嘅幸運項鍊，陪咗我十幾年架嘞，俾你啦。

真真：條鍊咁重要…我唔收得架…

（亞 Ken 逕自給真真戴上項鍊）

真真：好多謝你地呀…但係…我嘅情況同恩熙一模一樣…冇希望架啦…

老板：恩熙？

（真真突然眼前一黑，昏倒在地上）

眾人：真真！真真…

(閉幕)

轉為醫院景

(真真躺在病床上，眾人在床邊守候)

老板：真真…真真…你醒啦？醫生！醫生…

真真：(困惑地看看四周) 呢度係邊度尼架？

老板：呢度係醫院，投先你暈咗，係我地送你尼架！

(醫生、護士入，替真真檢查)

真真：醫生…我仲有幾耐命呀？

醫生：(大惑不解) 小姐，我係醫生，唔係算命先生呀，我點知你仲有幾耐命呀…

(眾人愣住)

醫生：你只係疲勞過度先會暈咗架啫，休息多啲就冇事架嘞。

真真：乜…乜我唔係有血癌咩？我…我尼排成日都流鼻血…仲甩好多頭髮啫…

醫生：小姐，血癌並唔係咁簡單架…你係因為熱氣同埋唔夠瞓先會流鼻血架啫，至於甩頭髮…你去 salon 做吓 treatment 應該就冇事架嘞。冇咩事嘅話，可以去辦出院手續。

真真：Yeah！我唔洗死呀！我唔洗洗呀！（興奮得在床上翻來滾去）

老板：(笑) 你好好地休息吓啦，我去幫你搞埋啲出院手續。(出)

亞 Ken：(忍著笑) 連呢啲都可以搞錯…(掩著嘴笑著離去)

Baby：你成日都咁糊塗架…投先見你暈咗我地幾驚呀…累我地嗰咗咁多眼淚…

楚楚：（無奈）都唔知好黠定好笑…

真真：（傻笑）呵呵…

第六幕：公司

（眾人各自在工作）

Baby：死啦！咁鬼多嘢未做…

楚楚：約咗男朋友呀？

Baby：（苦惱）係呀…就尼夠鐘啦…仲有成咋野未做完…

楚楚：唉！鬼叫老板接咗單大 **Project** 咩…我本來約咗亞爸亞媽今晚打邊爐架…睇嚟都有得去架喇…

Baby：（看著真真笑）我有辦法！

楚楚：咩辦法呀？

（**Baby** 走向真真）

Baby：（在真真耳邊喊）真真！

真真：（嚇了一跳）嚇死我…

Baby：（眨眨眼）嘻嘻，玩下之嘛…（雙手搖著真真的肩膀）

真真：做咩呀？

Baby：（伏在真真的背上撒嬌）係咁嘅…今日係我爹嘍生日呀…我應承話早啲返去同佢慶祝架…但係啲嘢又未做完…你可唔可以幫吓我呀？

真真：但係我自己啲嘢都未搞掂啫…

Baby：（嗔聲嗔氣）尼啦…幫埋我呢次咁多多啦…吓？好啦…你都唔想我俾人話係不孝女架…

真真：好啦好啦…

Baby：Yeah！（向楚楚眨眨眼，親親真真的臉頰）多謝你呀！我就知道你係最好人架嘞！

真真：唔使客氣…就當係我送俾你爹哋既生日禮物啦！（傻笑）呵呵…

Baby：（隨即把一疊文件放在真真的桌上）係咁就拜託你啦！

（真真嘆口氣，又繼續埋頭苦幹。一會兒，楚楚走向真真）

楚楚：（眼泛淚光）真真…

真真：楚楚，發生咩事呀？

楚楚：投先我亞媽打給我，話老豆又輸晒啲錢…仲飲到爛醉咁返尼…我好驚佢又會打我亞媽呀…（用衣袖擦眼睛）

真真：咁你快啲快去睇吓啦！

楚楚：但係我仲有成堆嘢未做呀…啲嘢唔做唔得架…

真真：我都好想幫你架楚楚…但係你都見啦…我仲有成堆嘢未做呀…（看看楚楚交給她的一堆文件，轉向旁邊的亞 Ken）亞 Ken…

亞 Ken：我從來都唔理人地嘅事。

真真：（嘟嘟嘴，轉向勝哥）勝哥…

勝哥：（皺起眉頭）對唔住呀，我都好想幫你地架，但係咁啱陣間我要帶屋企隻狗去覆診…所以…

真真：（失望）哦…唔緊要啦…（向楚楚）楚楚你有啲咩要做嘅就擺俾我嘞…

楚楚：真嘅？

真真：嗯，你快啲返屋企睇吓啦！

楚楚：（笑）多謝你呀！（旋即捧來一大疊文件）呢啲都係趕住要架…

真真：（傻笑著接過文件）呵呵…無問題…（重重地嘆口氣，又繼續埋頭苦幹）

（老板在茶水間看著這一切，不禁搖頭嘆氣，打開抽屜，拿出墨鏡戴上）

（燈滅）

～ 全劇完 ～